

Школин шин гермүд тосхгдв

Черноземельск районд джил болгън школмуд тосхлгън өсәд бәәнә.

Эн джил «Черноземельский» совхоз эврәннь дундин школдан хойр давхр чолун гер бәрдж бәәнә. Эн герт 400 гар бикдүд сурдж чадхмн. Шидрәс дөрвн пәтртә шин гер багшнрт совхозас гаргъдж өггдхмн.

Комсомольск дундин школин гермүд, балгъсна гермүдәс му биш. Болв үвлд класмудин хораснь киитн болдг билә. Ода школин гурвн гермүдт усна уураp халуллгън кегдджәнә.

Кумск долан джилә школин күүкд урднь хуучн шавр герт сурдг билә. Одахн эн селәнд, государственн комисс,

тосхачнрас школин шин гер хәләдж авб. Толгъалдж тосхснь багъ наста комсомолец прораб Лиджин Михаил, ширин үнрәр канькнсн, гилвксн хорасар, ирсн оln әмтиг дахулдж, үзүлв. Сәәхн шар чолун герт классин тавн хора, спортзал, багшнрин болн директорин хорас бәәнә. Хувцан өлгдг хора болн амрдг ик зал бас кегддж. Ут-туршдан эн школд 300 күүкд сурч чадхмн.

Тосхачнр школд ганцхн гер тосхсн уга. Герин өөр эдн ус хадгълдг ик бассейн болн модна урнә мастерской тосхв.

Ода школин гериг эздүдтнь

өгчкәд, Лиджин Михаил эврәннь үүрмүдтәгъән интернатин гер тосхджана. Энүнд күүкд унтдг, хот кедг, хот уудг, нүргаран угъадг, хувцан тәәлдг, амрдг хорас кегдхмн.

Тосхач Лиджин Михаил мандд иигдж келв: «Эврәннь төрскн газртан ирәд, бидн кесг гермүд бәрввдн. Эднәс ик гиснь — эн школин гер. Мана көдлмшиг сән гиснд байрлджанавдн. Ода, шунмгъагъар көдләд, бидн алдр Октябрьск революцин 41 өөн күртл интернатин гер төгсгхәр шиидввдн. Шиидврән күцәхвдн».

БОУВАН Мандж,

Черноземельск района эрдм-

сургулин отделин заведующ.